

Franza atenderà e le cosse de Italia seguito sia ditto apontamento; e si dize el ducha di Milan darà li castelli di Milan e Cremona in man de' sguizari.

184 *A dì 4.* La matina non fo il Principe in Colegio, *ut supra.* Sta meglio, sta in quiete e non pol caminar.

Vene Zuan Ferman scrivane de le Cazude, a dolersi de una sententia fata eri per sier Antonio da Canal, sier Giacomo Gabriel e sier Luca Loredan oficiali a le Cazude, per la qual sententiono al dito predito ducati 3500, che lui Zuan Ferman in anni cinque à tolto, aspetanti ai signori stati in l'oficio; li quali la mità aspeta a la Signoria nostra, et ducati 500 a l'Arsenal per la pena etc., *ut in sententia*, dicendo li diti signori non lo poteva sententiar per esser homo dil Consejo di X, et è una parte presa ivi, che se niun li tolesse alcuna utilità, la Signoria pagasse dil suo. *Item*, che loro non era zudexi agitando la loro utilità; *tertio*, non è stà tolto le sue justification. Hor li diti signori de le Cazude justificatione la sententia, et che la criminalità l'haveano lassà a punir a li Avogadori, *ut in sententia* etc. Parse a li consieri che ditta sententia fusse sospesa et si andasse a li Avogadori, et fo mal facto; ma ditto Zuanne à gran poder in questa terra, *maxime* con sier Alvise da Molin e sier Zacharia Dolfin. È fato richissimo, ha eaxe, possession e triumpho il mondo, è stà amalato et *in extremis*; hora veste di beretino.

Di Padoa, dil capitano general non fo letere, ma dil Contarini provedador zeneral, di eri, di campo a le Brentelle, hore do di note. Avisa esser letere di Anguilara, di domino Mercurio Bua, qual andò sopra il Polesene, di hore 19, dil zonzar li con la cavalcata, et Baldisera di Scipion con altri cavali è andato a dito Polesene per una altra via, acciò quelli inimici, quali è zercha cavali 150 tra padoani e veronesi, che erano in le possession di la Signoria a la Canda e Pontechio acciò li factori di la Signoria non desse le biave a la Signoria e loro tuorle insieme con alcuni spagnoli; et che andavano di longo et sperava di bene. *Item*, scrive zercha danari, bisogna 12 milia ducati per pagar etc. *Item*, manda una deposition di uno venuto da Vicenza a l'hora, qual per nostri fo mandato per saper de i inimici:

Referisse Vincenzo Composta, qual parti da Vicenza stamatina, a di 3, a l'aprir di la porta aver visto in una piazola, a pe' di la porta, cassoni 30 di pan vuodi, e in el locho non esser altro che uno forner. *Item*, che li ne era da 800 todeschi, per quanto li

fo ditto. *Præterea*, che pasando per el campo yspano, l'ha visto pezi 10 de artellarie, 4 grosse, el resto soto l'altre; et che stando li, el vene la scorta che havea 184* compagna li sacomani, ch'era 300 cavalli tra homeni d'arme e lizieri, et fanti 400, et boche do d'artellaria piccola con uno caro de munition, li quali erano stati a Monte Galda, et li haveano preso uno boaro che aveva portà vituarie in castello, per quanto li fo ditto. *Præterea*, che 'l capitano di Brendola era zonto in campo, qual havea abandonà el castello. Se dice in ditto campo che se doveano levarsi e non se intendea per qual locho, et che haveano da 60 cari de farine cargi sui cari.

Di Friul, fo letere di sier Zuan Vituri provedador zeneral, di 2, a Predoman. Come ivi era con Zuan Paulo Manfron, e le zente inimice haveano posto 40 cara di vin in Maran, et parte erano intrati in Gradischa et parte in Gorizia.

Di Udene, dil locotenente

Da Constantinopoli, eri sera, fo letere di sier 185 Nicolò Zustinian baylo, di 14 Mazo, date in Pera. Come el Sophi veniva zoso a' danni del Signor turcho con grandissimo exercito, ch'è senza numero, e zà è di qua di Tauris zornate 20, et intrato nel paese dil Signor turcho 5 over 6 zornate: contra dil qual è andato il Signor turcho con persone pagate da numero 120 milia, ch'è uno bellissimo exercito, ma tutti vanno come a la morte e mal volentiera contra el Sophi per esser parte di la sua fatione; et quelli vien col Sophi, vanno *voluntarie* a la morte per suo amor. Et tien lui, baylo, che non sarà Avosto che ditti exerciti sarano a la zornata, et seguirà tanto sangue quanto sia stà zà più centenera di anni al mondo, et tutti va l'un contra l'altro. El Signor fe' in pressa andar, perchè chi sarà più in qua tanto più el Sophi averà otenuto, perchè dove el va tutti el seguita; et à mandato 25 milia cavali lizieri avanti per aquistar più paese i poleno. Conclude esso baylo, che s' il Signor turcho non ne ha dato ajuto, à 'uto gran raxone, havendo tanto da far per lui; e altre particolarità. Le qual letere fo trate di zifra e lecte in Colegio con li Cai di X, et Io ne vidi una drizzata a suo fradelo sier Piero Justinian con queste nove in substantia.

Veneno in Colegio sier Alvise da Molin e sier Zacarin Dolfin provedadori sora il trovar di danari, e introno in l'ofizio et volseno audientia con li Cai di X, atento bisogna trovar *immediate* ducati 10 milia e mandarli in campo.